

四庫全書

史部

欽定四庫全書

史部

欽定續文獻通考卷一百四十八

主事臣陳若霖覆校

總校官內閣中書臣孫溶

欽定四庫全書

欽定續文獻通考卷二百四十七

四裔考

西域

臣等謹按一統志哈密所屬編為旗分視各蒙古

是固不得外視之矣今仍列於西域者從前史舊

文耳

哈密衛

元末以威武王古納實哩鎮哈密

尋改為肅王卒弟恩克特穆爾嗣

明史哈密傳曰東去嘉峪關一千六百里漢伊吾
盧地明帝置宜禾都尉領屯田唐為伊州宋入於
回紇至是時乃以宗王鎮之

臣等謹按元史諸王表成宗大德八年封楚巴威
武西寧王十一年進封豳王仁宗延祐七年納古
爾襲封不載古納實哩事考明成祖實錄永樂二

年哈密恩克特穆爾請封爵禮部尚書李至剛等
議奏其兄古納實哩元封威武王改封肅王卒恩
克特穆爾繼為肅王今既內屬宜仍王爵而改封
之此西域傳之所據也

明成祖永樂元年十一月哈密王恩克特穆爾遣使至
京師

先是洪武中既定輝和爾地置安定等衛漸逼哈密
恩克特穆爾懼將納款帝初立遣官召諭之至是始

至明年六月封為忠順王已而迤北汗果勒齊毒死
之其國人以病卒聞三年二月遣官賜祭帝以其兄
子托克托自幼俘入中國拔之奴隸中俾列宿衛欲
令嗣爵恐其國不從遣官問之不敢違請還主其國
四年春托克托為祖母所逐帝怒敕責其頭目由是
得還國三月立喀密衛以其頭目為指揮千百戶等
官明年頭目陸寶等作亂帝命甘肅總兵宋晟發兵
應之又以恩克特穆爾妻子往依果勒齊恐誘賊侵

哈密敦守臣謹備之并敕開誠撫托克托八年托克托以暴疾卒擢都指揮同知哈刺哈納為都督僉事鎮守其地且封托克托從弟穆爾特穆爾為忠義王世守哈密宣宗宣德元年遣使賜祭忠義王命故王托克托子布達實哩嗣忠順王

三年以布達實哩年幼命故忠義王弟托歡特穆爾嗣忠義王同理國事自是二王並貢歲或三四至奏求婚娶禮幣命悉予之正統二年托歡特穆爾卒封

其子圖卜特穆爾為忠義王未幾卒已而布達實哩亦卒封其子多卜丹實哩為忠順王

明史喀密傳曰初成祖之封忠順也以喀密為西域要道欲其迎護朝使統領諸番為西陲屏蔽而其王率庸懦又其地種落雜居一曰回回一曰輝和爾一曰喀拉呼其頭目不相統屬王莫能節制衆心離渙國勢漸衰及多卜丹實哩立都督丕勒烏潛通威喇特孟克布喀等謀殺王不克王父在時

納沙州叛亡百餘家屢敕王令還止還其半其使
臣肆詬詈天子不加罪但令慎擇使臣以是益無
忌其地北威喇特西吐魯番東沙州罕東徹辰諸
衛悉與構怨由是隣國交侵罕東兵抵城外掠人
畜去沙州徹辰先後兵侵皆大獲威喇特酋額森
錫哩弟也亦遣兵圍哈密城殺頭目俘男婦掠牛
馬駝不可勝計取王母及妻北還脅王親詣威喇
特迄不能自振會額森方東犯不復還故土以是

哈密獲少安

英宗天順元年封哈密伯勒格為忠順王

伯勒格者多卜丹實哩弟也時以多卜丹實哩卒故封之四年伯勒格卒無子母遵達實哩主國事哈密素衰微又婦人主國衆益離散迤北酋沙克嘉斯賚乘隙襲其城大肆殺掠王母率親屬部落走苦峪數告難朝廷不能援但救其國人速議當繼者而已

憲宗成化二年命擢巴達瑪為右都督攝行哈密國王

事

自伯勒格之亡親屬無可襲者頭目阿齊等言托歡
特穆爾外孫巴達瑪可繼王母謂臣不可繼君國無
王者八年至是頭目交章請詞極哀乃有是命八年
其子哈沙以父卒請嗣職帝許之而不命其主國事
國中政令無所出吐魯番蘓爾坦阿里乘機襲破其
城執王母奪金印以忠順王孫女為妾據守其地九
年四月事聞遣都督同知李文等赴甘肅時阿里留

其妹婿伊楞守哈密而已攜王母金印返吐魯番文
等檄哈沙及徹辰罕東納克賚諸部集兵進討十年
冬兵至布隆濟爾川不敢進哈沙等退去苦峪文等
亦引還肅州帝乃命哈沙權主國事并命邊臣築苦
峪城移哈密於其地十八年春哈沙糾罕東徹辰二
衛兵與已所部共萬人夜襲破哈密城伊楞遁走乘
勢連復八城遂還居故土事聞進左都督并將士陞
賞有差

孝宗弘治元年封哈沙為忠順王

時吐魯番阿里已死其子阿哈瑪特嗣為蘇爾坦偽
與哈沙結婚誘而殺之仍令伊楞據其地哈密都指揮阿
木古朗來奔求救哈沙弟恩克布拉克率部衆逃之邊
方明年哈密舊部綽克圖等率衆攻伊楞殺其弟奪
叛臣者彭布等人畜以歸阿木古朗又請邊臣調徹
辰罕東兵夜襲破其城伊楞遁去斬獲甚多時阿哈瑪特
桀傲甚自以地遠中國屢抗朝命帝敕責令悔罪已訪

獲忠順王族孫善巴將輔立之阿哈瑪特漸警懼三年遣使叩闕願獻還喀密及金印明年以城印來歸五年春命立善巴為忠順王

尚書馬文升言番人重種類且素服蒙古喀密故有回回輝和爾哈拉呼三種北山又有舒魯克圖訥克齊相侵逼非得蒙古後裔鎮之不可今安定王族人善巴乃故忠義王托克托近族從孫可主喀密帝以為然而諸番亦共奏善巴當立故有是命并擢阿木

古朗都督僉事與都督同知恩克布拉克共輔之已而諸番索善巴犒賞不得皆怨阿木古朗又引訥克賚人掠吐魯番牛馬阿哈瑪特怒六年春潛兵夜襲哈密殺其人百餘逃及降者各半善巴與阿木古朗據達圖喇以守

達圖喇華言大土臺也

圍三日不下阿木古朗

急調訥克賚威喇特二部兵來援俱敗去乃執善巴禽阿木古朗支解之伊楞復據守焉

七年阿哈瑪特遣使詭言願還善巴及哈密

先是伊楞據哈密變聞大學士邱濬欲馬文升經畧西陲文升以番人嗜利不善騎射自古未有西域能為中國患者徐當靖之濬復以為言文升請行廷議以本兵未可遠出乃推右侍郎張海都督同知緱謙二人皆庸才但遣吐魯番人歸諭其主駐甘州待之至是阿哈瑪特詭言願還善巴海等以聞廷議以善巴被虜孱弱可知即使復還勢難復立宜草其王爵居之甘州犒賚安定王諭以不復立之故令都督恩

克布拉克

係輝和爾

總理哈密事與賽音和碩

係同

拜達

勒默色

係拉呼

等分領三種番人以輔之且修濬苦峪

城墜凡番人散處甘涼者令悉還其地給以牛具口

糧我不急索善巴彼將自還也帝如其言勅諭海等

海等喜甚即如諭閉嘉峪關修苦峪城令流寓番人

歸其地拜疏還朝言官交章劾其無功並下吏貶秩

而哈密終不還

十年阿哈瑪特送還善巴及哈密之衆

先是八年馬文升銳意謀興復用許進巡撫甘肅偕大將劉寧等潛師夜襲伊撈逸去斬其餘卒撫降餘衆而還自明初以來官軍無涉其地者至是諸番始知所畏又以朝廷閉關絕貢咸怨阿哈瑪特阿哈瑪特悔乃送善巴及哈密之衆還冬起王越總制三邊軍務兼經理哈密越言哈密不可棄善巴亦不可廢宜仍其舊封令先還哈密量給修城築室之費犒賜三種番人及徹辰罕東舒魯克圖訥克賚諸部以獎

前勞且責後效報可自是哈密復安

十八年冬善巴子巴雅濟濟自稱蘇勒坦命封為忠順王
初恩克布拉克與善巴不相能當事患之令善巴娶
其兄哈沙女與之結好善巴嗜酒培克失衆心部下
額布埒等咸怨陰構阿哈瑪特迎其幼子展特穆爾
主哈密善巴走苦峪恩克布拉克與賽音和額在肅
州邊臣以二人為番衆所服令還輔善巴與百戶董傑
偕行傑有膽畧計斬額布埒其下遂不敢叛乃令善

已還哈密展特穆爾還吐魯番展特穆爾年十三其
母即哈沙女聞父已死兄瑪克蘇爾嗣與諸弟相讐
殺懼不敢歸願倚恩克布拉克曰我外祖也邊臣慮
與善已隙居之甘州至是善已卒已雅濟濟嗣瑪克
蘇爾與通和且遣使求其弟展特穆爾迨正德六年始命
賽音和碩偕都督瑪哈拉森送之西還吐魯番寫酋素輕
朝廷潛懷異志遂以國情輸瑪克蘇爾且誘已雅濟濟
叛已雅濟濟素昏愚又強暴心怵屬部害已瑪克蘇爾

又甘言誘之即欲偕恩克布拉克同往不從奔肅州
武宗正德元年命都御史彭澤經畧哈密

瑪克蘓爾遣和卓塔實昂據哈密人遣和卓瑪哈穆
特赴甘肅言已雅濟濟不能守國瑪克蘓爾遣將代
守乞犒賜事聞命彭澤往經畧抵甘州謂番人嗜利
可因而歛也遣人諭令還侵地及王予重賞瑪克蘓
爾偽許之十一年正月拜疏遂朝忠順王迄不返塔
實昂亦不肯退復要重賞始以城來歸

十二年冬吐魯番復奪哈密城據之

先是五月甘肅巡撫李昆上言如必欲得忠順王復國乞敕瑪克蘇爾兄弟送還仍厚賜綵帛冀其效順廷議宜敕責負恩嚴兵為備從之初賽音和碩與瑪克蘇爾深相結故首倡逆謀已而有隙瑪克蘇爾欲殺之大懼求塔寶鼎為解許賂幣期至肅州界之且昭之人寇曰肅州可得也瑪克蘇爾喜令與其婿瑪哈穆特俱入貢以覘虛實且徵其賂邊臣以同來和

卓徹伯爾乃和卓塔實昂弟懼為變并其黨呼都克賽
音羈之甘州而督賽音和碩出關懼不肯去塔實昂聞其
弟被拘怒復奪哈密城請瑪克蘇爾移居之分兵脅據沙
州擁衆入寇至圖魯巴官兵戰沒賊薄肅州城副使
陳九疇固守且先絕其內應賊知事洩大掠而去
十五年瑪克蘇爾歸先所掠將卒及忠順王家屬復求
貢許之

自賽音和碩與子穆爾瑪哈穆特壻和卓瑪哈穆特

及其黨實保雅達俱以內應繫獄實保雅達被捶死
械賽音和碩赴京下獄其子仍繫甘州實保雅達子
穆爾瑪哈穆特者賽音和碩姪壻也以入貢在京探
知王瓊欲傾彭澤突入長安門訟父冤瓊劾澤欺罔
辱國斥為民坐李昆陳九疇激變逮下吏並獲重譴
賽音和碩亦減死遂負緣錢能與其壻得侍帝左右賜
國姓授官扈駕瑪克蘇爾以犯邊後屢求通貢不得
至是復求貢廷議許之而忠順王迄不還明年世宗

至賊始遁七年伊榜獲罪其主率部帳來歸邊臣受之瑪克蘇爾怒其部下和拉阿薩爾引威喇特二千餘騎犯肅州至老鸛堡值齊瑪爾罕使在堡中賊呼與語遊擊彭濟急引兵擊走之徹辰使人持番文求貢委罪威喇特詞多悖謾總督王瓊希時貴指必欲議撫因言番人且悔宜原情赦罪並上濬等功狀章下兵部尚書胡世寧力言哈密不必興復帝然之自是置哈密不問許吐魯番通貢西陲藉以息肩而哈

密後為實保雅達子穆爾瑪哈穆特所有服屬吐魯
番迄隆慶萬厯朝猶有入貢者然非忠順王苗裔也
明史哈密傳曰當嘉靖時番寇屢犯邊城當局者
無能振國威以雪讐耻而一二新進用事者反借
以修怨由是封疆之獄起百戶王邦奇者素憾楊
廷和彭澤嘉靖六年春上言澤賂番求和廷和論
殺蹇音和碩誅此兩人庶哈密可復賊不內侵桂
萼張璁輩欲藉此興大獄斥廷和澤為民盡置其

子弟親黨於理有自殺者復遣官往按番酋伊楞言非敢獲罪天朝所以犯邊由冤殺賽音和碩實保雅達二人故今願獻還城印贖前罪事下兵部萼以前獄未竟必欲重興大獄與禮兵二部尚書方獻夫王時中等協議為挑激之詞言宜嚴覈激變虛實又九疇報捷時稱瑪克蘇爾阿拉克已斃礮石下二人實未死帝固疑之覽萼等議益疑邊臣欺罔詔責九疇欲置之死尚書金獻民侍郎李

昆以上坐累者四十餘人七年正月九疇逮至下
獄萼等必欲殺之并株連廷和澤刑部尚書胡世
寧力救帝稍悟九疇免死澤獻民等皆落職番酋
氣益驕而萼又薦王瓊督三邊盡釋還九疇所擊
番使許通貢番酋迄不悔罪侮玩如故初胡世寧
之救陳九疇也欲棄哈密不守言已雅濟濟久歸
吐魯番即還故土亦其臣屬其他族裔無可繼者
回回一種早已歸之哈拉呼輝和爾二族逃附肅

州已久不可驅之出關然則哈密將安興復哉乞如先朝棄交趾故事置之不問庶不以外蕃疲中國唐事霍韜力駁其非迨世寧改掌兵部復以興復哈密非中國所急為言帝命瓊熟計詳處毋聽信番言至明年甘肅巡撫唐澤亦言哈密未易興復瓊善之據以上聞報可自是遂棄哈密矣

王圻曰鄭端簡謂是時瓊言瑪克蘇爾歸我哈密奉約來朝貢然哈密竟為吐魯番所據安挿諸衛

夷落皆為吐魯番所逐失其故土駐牧西河塞上北
鹵盤窟西海威刺特結巢北山河西三面皆有寇
盜矣

顧炎武日知錄曰唐之吐番即今之吐魯番回紇
即今之回回是也唐書回紇一名回鶻元史有輝
和爾部即回鶻也其曰回回者亦回鶻之轉聲也

元史太祖紀以回鶻
回回為二國悉非
其曰輝和爾者又回鶻之轉

聲也

冊府元龜按國史叙鐵勒種類云伊吾以西
焉耆以北有契弊烏護訖骨等部契弊則契

也烏護則烏統也後為回鶻統骨則統北斯明也轉為黠戛斯蓋音有緩急即傳譯語不同

會典哈密古伊吾廬地在燉煌北大磧外為西域

諸番往來要路其國部落與回回輝和爾三種

居則回回與輝和爾又為二種矣鄭所南心史輝和爾乃鞑靼為

父回回為母者也

柳城

臣等謹按明史西域傳柳城火州與吐魯番並列今以一統志考之吐魯番初與柳城俱屬火州後

乃併有火州柳城之地

國初內附貢使不絕編旗駐牧瓜州實蒙古屬國也
茲第從明史錄其舊事於左

明成祖永樂四年五月命使齎綵幣賜柳城酋長

時遣鴻臚丞劉特穆爾使巴實伯里因有是命明年
其萬戶烏察喇濟遣使來貢七年十一年二十年及
宣德正統時並入貢後不復至

明史柳城傳曰一名魯陳又名柳陳城即後漢柳

中地西域長史所治唐置柳中縣西去火州七十里
東去哈密千里經一大川道旁多骸骨相傳有鬼
魅行旅早暮失侶多迷死出大川渡流沙在火山
下有城屹然廣二三里即柳城也四面皆田園流
水環繞樹木陰翳土宜糝麥豆麻有桃李棗瓜胡
蘆之屬而葡萄最多小而甘無核名瑣瑣葡萄畜
有斗馬羊駝節候常和土人純樸男子椎結女子
蒙皂布其語音類輝和爾密邇火州及吐魯番後

吐魯番強二國並為所滅

火州

明成祖永樂四年五月命以絲幣賜火州王子哈繼
時命鴻臚丞劉特穆爾護巴實伯里使者歸因齎賜
之明年遣來使因言回回行賈京師者甘涼軍士多
私送出境洩漏邊務帝命御史徃按且敕總兵官宋
晟嚴束之七年十一年十三年並入貢正統十三年
後不復至

明史火州傳曰又名哈喇在柳城西七十里吐魯
番東三十里即漢車師前王地隋時為高昌國唐
太宗滅高昌以其地為西州宋時回鶻居之元名
火州與安定曲先諸衛統號輝和爾置達魯噶齊
監治之其地多山青紅若火故名火州氣候熱五
穀畜產與柳城同城方十餘里僧寺多於民居東
有荒城即高昌國都漢戍已校尉所治西北連巴
實伯里國小不能自立後為吐魯番所并

吐魯番

明成祖永樂五年吐魯番遣使達京師

先是遣官使巴實伯里道其地以綵幣賜其萬戶賽
音特穆爾自是朝貢不絕六年授其國番僧清來為
國師徒法泉等七人並為僧綱司官令化導番俗二
十年其酋伊濟徹爾為巴實伯里酋烏蘇所逐走歸京
師命為都督僉事遣還故土宣德三年其子孟克特
穆爾又都督蕪色弟孟克特穆爾五年僉事額森特

二百四十七
穆爾七年其酋已刺瑪特皆來朝

明史吐魯番傳曰在火州西百里去哈密千餘里

嘉峪關二千六百里漢車師前王地隋高昌國唐

滅高昌置西州及交河縣此則交河縣安樂城也

宋復名高昌為回鶻所據

詳馬端臨考

嘗入貢元設萬

戶府

臣等謹按葉隆禮契丹國志高昌都交河城漢車

師前王庭也四面多大山石磧氣候溫暖厥土良

沃麥一歲再熟宜蠶有草名羊刺其上生蜜而味甚佳引水溉田出赤鹽其味甚美俗事天神兼信佛法其官有八長史有王將軍又有侍郎校郎至部從事階位相次亦有互市其國主親與北主評價又元史太祖紀十八年夏定西域諸城置高昌等達魯噶齊監治之時號為輝和爾地猶未稱吐魯番也

憲宗成化九年春吐魯番襲破哈密城

初其地介于闐巴實伯里諸大國間勢甚微弱後侵掠火州柳城皆為所并國日強其酋額默勒和卓遂僭稱王成化五年其酋阿里自稱蘇勒坦奏求海青鞍馬蟒服綵幣罷用禮官言物多違禁不可盡從命賜綵幣布帛六年復奏求和必斯箏鼓羅韞鎧高麗布諸物廷議不許時吐魯番愈強而哈密以無主削弱阿里欲并之至是執哈密王母奪金印分兵守之而去朝廷命李文等經畧無功而還阿里修貢如故一

歲中使來者三朝廷仍善待之未嘗一語嚴詰貢使益傲
求馴象兵部言象以備儀衛禮有進獻無求索乃却其請
使臣復言已得哈密城池及威喇特阿勒坦王人馬一萬
又收捕庫春并伊實格頭目多喇和卓乞朝廷遣使通
道往來和好帝曰迤西道無阻不須遣官阿里果誠心修
貢朝廷不計前愆仍以禮待使臣復言徹辰諸衛素有仇
乞遣將士護行且謂阿里雖得哈密止以物產充貢願質
使臣家屬於邊賜敕歸諭其王獻還城印帝從其護行

之請而賜敕諭阿里獻王母及城印即和好如初使臣還
復遣他使再入貢而不還哈密十二年八月甘州守臣言
番使謂王母已死城印俱存俟朝廷往諭即獻還帝
已却其貢使復俾入京時大臣專務姑息致遐方小醜
無顧忌

十四年吐魯番阿里子阿哈瑪特嗣為蘇勒坦

至弘治十七年阿哈瑪特死諸子爭立相仇殺已而
長子瑪克蘇爾嗣為蘇勒坦桀黠變詐踰於父復有吞

哈密之志正德四年其弟展特穆爾自甘州還即以
邊情告其兄共謀為逆九年誘忠順王善巴之子巴
雅濟濟叛復據哈密朝廷遣彭澤經畧贖還城印其
部下塔實昂復據之且導瑪克蘇爾侵肅州自是哈密
不可復得而患且中於甘肅會中朝大臣自相傾陷番酋
覘知之益肆讒構賊腹心得侍天子中國體大虧賊氣
焰益盛十五年甘肅巡按潘倣奏絕其貢王瓊力主
款議不納其言明年世宗立賊腹心賽音和碩伏誅

失所恃再謀犯邊嘉靖三年寇肅州掠甘州四年復
寇肅州皆失利去於是卑詞求貢仍許之而哈密城
印及忠順王存亡置不復問西河稍獲休息而瑪克
蘓爾桀傲益甚矣至二十四年瑪克蘓爾死長子沙
嗣為蘓勒坦其弟瑪哈穆特亦稱蘇勒坦分據哈密已
而兄弟讐殺瑪哈穆特乃結婚威喇特以抗其兄且
壅田沙州謀入犯邊臣諭止之乃還故土與兄同處
隆慶四年瑪哈穆特嗣兄職遣使謝恩其弟薩巴等三

人亦各稱蕪勒坦

臣等謹按吐魯番事自憲宗朝後類見於哈密威喇特等傳及土貢考中若神宗萬厯後則無事可見

西番諸衛

西寧河州洮州岷州等番族諸衛

臣等謹按一統志明西番地

國初為厄魯特古實罕所有遣使修貢後自分為左右二境部落散處其間謂之西海諸台吉今仍明史舊文故猶稱西番諸衛云

元世祖至元時設吐番等處宣慰司

西番即西羌族種最多自陝西歷四川雲南西徼外
皆是其散處河湟洮岷間者為中國患尤劇漢趙充
國張奐段熲唐哥舒翰宋王韶之所經營皆其地元
封駙馬章庫為寧濮郡王鎮西寧於河州設吐番宣
慰司以洮岷黎雅諸州隸之統治番衆

明太祖洪武二年既定陝西即遣官齎詔招諭吐番諸部
時西番酋長皆觀望復遣使招之乃多聽命明年五

月吐蕃宣慰司索諾木諾爾布等以元所授印敕來上會
鄧愈克河州遂詣軍前降其鎮西武靖王布拉納亦以
吐蕃諸部來納款四年正月設河州衛所皆命其酋長
為之帶刀侍衛嗣改西寧州為衛并與西番市馬

見市
糴考

臣等謹按元史世祖紀及諸王表百官志釋老傳
當其初起朔方固已崇尚佛教及得西域以其地
廣而險遠民獷而好鬪思有以因其俗而柔其人
乃郡縣吐蕃之地設官分職立總志院而領以國

師至世祖至元二十五年十一月因唐制吐蕃來朝見於宣政殿之故更名宣政院掌釋教僧徒及吐蕃之境而隸治之其後又設吐蕃等處宣慰司此明史西域傳之所據也惟駙馬章庫則元史作駙馬昌吉為小異耳

十二年洮州十八族番酋三副使等叛命將討之

時叛據納琳七站之地征西將軍沐英率軍至洮州舊城寇遁去追斬其魁盡獲畜產遂於東籠山南川

度地築城置洮州衛命官戍守復進敗番寇盡擒其
魁俘斬數萬人獲馬牛羊數十萬自是羣番震懼不
敢為寇

二十五年遣官齎金銅信符敕諭往賜諸番族

先是青海酋長史拉巴等來歸岷州亦設衛番人歲
以馬易茶諸衛將士有擅索番人馬者故齎以賜涼
甘肅永昌山丹臨洮鞏昌西寧洮河岷諸處諭以遇
有徵發必比對相符始行否則偽械至京罪之自是

需求遂絕

成祖永樂時西番諸衛僧戒行精勤者悉給印誥許世襲

洪武時西寧番僧薩喇為書招降罕東諸郡又建佛刹於碾白南川以居其衆及來朝諸敕護持賜寺額名瞿曇寺立西寧及河州番漢凡三僧綱司其徒遂爭建寺輒賜嘉名番僧來者日衆至是多授喇嘛禪師灌頂國師之號有加至大國師西天佛子者由

是族種輻輳京師

見土貢考

西番之勢益分其力益弱西

陞之患亦益寡至宣德元年以協討安定庫春功加

封國師圖薩巴凌展等各給誥印

憲宗成化四年冬洮州番寇擁衆掠鐵城後川二寨

時指揮張翰等率兵敗之獲所掠人口以歸五年巡

按江孟綸言生番忍藏占藏等三十餘族熟番拉哩

等二十四族俱悔過來歸且還被掠人畜願供徭賦

誓不再犯惟熟番綠園一族怙惡不服事聞兵部請

諭邊臣向化者撫綏犯順者勦滅帝納其言

武宗正德四年蒙古部酋額布勒鄂爾多斯襲西寧之青海據之

西寧即古湟中其西四百里有青海又曰西海水草豐美番人環居之專務畜牧日益繁滋素號樂土至是額布勒二人獲罪其主擁衆西奔瞰知青海饒富大肆焚掠番人失其地多遠徙其留者不能自存反為所役屬自是甘肅西寧始有海寇患九年寇訶知

諸道軍將擣其巢由河州渡黃河奔四川出松潘茂
州境直走烏斯藏及大軍引還仍返海上惟鄂爾多
斯遁去

世宗嘉靖八年洮岷諸番數犯臨洮鞏昌內地騷動

先是楊一清為總制議大舉勦寇代之者以兵寡餉
詘竟不行至是樞臣李承勲言番為海寇所侵日益內
徙倘二寇交通何以善後請以西事專任總制王瓊
瓊集衆議且勦且撫明年二月洮州東路木舍等三

十一族西路達實等一十三族岷州西寧溝等十五族皆聽撫惟岷州東路日寵族西路巴爾等十五族及岷州拉沁等五族恃險不服乃令兵先攻日寵巴爾二族覆其巢拉沁諸族震懼乞降乃班師自是洮岷獲寧而西寧仍苦寇患十一年河套酋濟農引衆西掠大破額布勒營收其部落大半而去惟其黨布爾罕一枝斂衆自保自是西寧亦獲休息

三十八年北部諳達襲據青海縱掠諸番

時諳達猖獗歲掠宣大諸鎮又羨青海富饒攜子賓
圖賓都等數萬衆襲據其地布爾罕竄走遂縱掠諸
番已引去留賓圖據松山賓都據青海西寧亦被其
患隆慶中諳達受封修貢惟謹二子亦斂戢會烏斯
藏有稱活佛者諸部多奉其教賓都乃以焚修為名
請建寺青海及嘉峪關外為久居計廷臣多言不可
許帝竟從禮官言許之賓都既得請又近脅番人使
通道松潘以迎活佛四川守臣懼逼乞令諳達約束

其子毋擾鄰境諸達乃以開市為請萬歷二年冬許
賓都市於甘肅賓圖市於莊浪歲一次既而寺成賜額
仰華先是額布勒據青海邊臣猶以外寇視之至是
以諳達故竟視若屬番諸酋亦以父受王封不敢大
為邊患而洮州之變乃起洮州番人以河州奸民負
其物貨入掠內地他族亦乘機為亂總督石茂華集
軍分討斬獲甚衆諸番震恐誓不再犯乃還

神宗萬歷八年八月賓都率衆擾掠番人並及內地

自賓都據青海有諳達從孫齊勤台吉從之而西屢掠番人不得志邀諳達往助諳達雅欲侵威喇特乃假迎活佛名擁衆西行既抵威喇特戰敗而還乃移書甘肅守臣乞假道赴烏斯藏守臣不能拒遂越甘肅而南會諸酋於海上番人益遭蹂躪多竄徙是年春始以活佛言東還而齊勤弟果勒齊及諳達庶兄子永恰布遂留居青海不去至是賓都擾掠人畜諳達聞之馳書切責盡還所掠帝方嘉其恭順而果勒

齊侵掠蕃族不休守臣檄齊勤台吉約束之亦引罪
輸服及詣達辛傳至孫齊哩克勢輕不能制諸酋十
六年九月永恰布部衆有闌入西寧者肆侵盜無所
憚時賓都及齊勤台吉亦皆死賓都子真相移駐莽
賚川果勒齊移駐寧鞏川逼近西寧日蠶食蕃族蕃
不能支則折而為寇用齊哩克又西行助之勢益熾
十八年命尚書鄭洛經畧西陲

是年六月北部入舊洮州七月復深入大掠河州臨

洮渭源官軍屢敗績西陲大震事聞乃有是命洛前
督宣大軍撫諳達有恩遣使趣齊哩克東歸而大布
招番之令歸附者不絕和珍二酋自知罪重又聞套
酋布色圖來助大敗於水泉口齊哩克復將還巢始
懼徙帳去留其黨克卜圖等於莽賚川官兵破走之
洛更進兵青海焚仰華寺逐其餘衆而還番人復業
者至八萬餘人西陲暫獲休息已復聚於青海二十
三年永恰布諸部犯南川又連和珍二酋犯西川明

年諸酋復掠番族二十七年糾叛苗犯洮岷三十四
年復入鎮番海古勒城屢為官軍所破敗并撫降番
族甚衆自是抄掠不能得志時為陝西患者有三大
寇一河套一松山一青海青海土最沃且有番人屏
蔽故患猶不甚劇

愍帝崇禎十五年西寧番族作亂官軍勦之

先是流寇李自成自北州軼出番地諸將窮追復奔
入塞內番族遭其蹂躪至是番族亂官軍五道進勦

斬首七百有奇撫降三十八族而還明年冬自成遣將陷甘州獨西寧不下賊將尋攻破之遂進掠青海諸苗多降附而明亦亡

明史西番諸衛傳曰番有生熟二種生番獷悍難制熟番納馬市茶頗柔服後寢通生番為內地患自青海為寇所據番不堪剝敎私饋皮幣曰手信歲時加饋曰添巴或反為嚮導交通無忌而中國市馬亦鮮至蓋已失捍外衛內之初意矣原夫高

帝甫定關中即法漢武朔河西四郡隔絕羌人之
意建重鎮於甘肅以北拒蒙古南捍諸蕃俾不得
相合又遣西寧等四衛土官與漢官叅治今之世
守且多置茶課司番人得以馬易茶而部族之長
亦許其歲時朝貢自通名號於天子彼勢既分又
動於利不敢為惡即小有蠢動邊將以偏師制之
靡不應時底定自邊臣失防敵得越境闖入與番
族交通西陲遂多事然究其時之所患終在敵而

不在蕃故議者以太祖制馭為善

安定衛

元封宗室布延特穆爾為寧王鎮薩里輝和爾

安定距甘州西南一千五百里漢為姑羌唐為吐蕃
地元封宗室布延特穆爾為寧王鎮之其地本名薩里
輝和爾廣袤千里東近罕東北通沙州南接西蕃居
無城郭以氊帳為廬舍產多駝馬牛羊

明太祖洪武八年正月封布延特穆爾為安定王

先是三年遣使持詔招諭七年六月布延特穆爾遣使來朝貢太祖喜厚賚其王而分其地為阿敦阿齊額森特哩四部各錫以印至是遣人上元所授金銀字牌請置安定阿敦二衛從之乃封為王以其部人沙喇等為指揮十年王為沙喇所弑王子巴咱爾寶哩復讐誅沙喇沙喇部將復殺王子部內大亂番將多爾濟巴勒叛走沙漠經安定大肆殺掠奪其印去其衆益衰二十九年復立安定衛授其酋長官以安

部衆永樂元年遣官齎敕撫諭薩里諸部四年安定
衛徙駐庫爾坦之地

成祖永樂十一年五月封額伯爾坦為安定王賜印誥
初安定王布延特穆爾被弑其子薩勒濟特沙克嘉
為其兄所殺部衆潰散子額伯爾坦流寓靈藏至是
率衆來朝自陳家難乞授職帝念其祖率先歸附故
令襲封至正統十一年冬額伯爾坦卒子琳沁格色
爾襲弘治三年琳沁格色爾卒子齊默襲正德時蒙

古大酋額布勒鄂爾多斯侵據青海縱掠鄰境安定
遂殘部衆散亡

臣等謹按安定王即哈密王宗屬也考明史列傳
哈密忠順王無子廷議安定王與之同祖遣官擇
一人為其後安定王不許至弘治時訪求善巴於

安定實忠順王之孫冊為忠順王

互見前哈密傳內

命沁

布遣送其家屬沁布欲立其弟綽爾濟部議不從
善巴迄得立然沁布以立非己意後哈密數被寇

竟不應援弘治十七年率衆侵沙州大掠而去

阿敦衛

明太祖洪武八年置阿敦衛

衛在薩里輝和爾之地後為多爾濟巴勒殘破其衛
遂廢永樂四年冬酋長錫錫呼爾察等來朝請復置
衛設官即授錫錫等為指揮僉事洪熙時庫春酋薩
奇蘇邀劫朝使脅阿敦指揮蘇爾坦偕行已大軍
出征蘇爾坦懼率部衆遠竄失其印宣德初遣使招

撫猶不敢歸依庫春雜處六年命宥其罪復故業於是其子展察罕率所部還居特爾格舊地明年展察罕入朝言阿敦故城在回回境去特爾格尚一月程朝貢艱乞移本土便從之迄正統後不知所終

明史阿敦傳曰時西域地又有名阿敦者貢道從哈密入與此為兩地

庫春衛

元設庫春達林元帥府

庫春東接安定在肅州西南古西戎漢西羌唐吐蕃也

明太祖洪武時命設庫春衛官其酋長為指揮

時酋長入貢遂有是命後遭多爾濟巴勒之亂部衆竄亡併入安定衛居阿齊之地永樂四年安定指揮哈繳薩奇蘇森濟等奏安定庫春本二衛後合為一比遭吐蕃巴圖侵擾乞仍分為二從之即令森濟為指揮使掌衛事薩奇蘇副之又從其請徙治藥王淮

之地洪熙時薩奇蘇偕安定部酋刼殺朝使大軍往討率衆遠遁宣德初遣官往招撫復業者四萬二千餘帳五年六月以薩奇蘇數率部衆邀刼往來貢使梗塞道途命將督西寧諸衛軍及安定罕東之衆往征之薩奇蘇先遁生禽其黨托克托布哈及男婦三百四十餘人獲駝馬牛羊三十四萬有奇自是西番震懼薩奇蘇素狡悍每怙惡不悛至是人畜多損失乃悔懼明年四月遣人請罪復待之如初令還故地

并歸其俘七年薩奇蘇卒命其子都哩嗣職至成化
時吐魯番強庫春被其侵掠正德七年蒙古酋鄂爾
多斯額布勒竄居青海庫春為所蹂躪部族竄徙其
衛遂亡

明史庫春傳曰明初設安定阿敦庫春罕東徹辰
沙州諸衛給之金牌令歲以馬易茶謂之差發沙
州徹辰隸肅州餘悉隸西寧時甘州西南盡皆番
族受邊臣羈絡惟北面防敵後諸衛盡亡額布勒

據青海吐魯番復據哈密逼處關外諸衛遷徙之
衆又環列甘肅肘腋獷悍難馴於是河西外防大
敵內防諸番兵事日亟

徹辰蒙古衛

臣等謹按明史徹辰蒙古沙州罕東三衛自明成
祖時已置令屏蔽西陲今以一統志考之則已置
安西靖逆兩廳治之矣茲仍明史之舊故附於西
域

明成祖永樂二年九月詔設徹辰蒙古所

先是洪武十三年都督濮英西討次白城獲蒙古平
章呼都克特穆爾進至徹辰站獲幽王額琳沁及其
部曲千四百人金印一師還復為蒙古部人所據至
是有塔爾尼者自稱丞相庫珠子率所部男婦五百
餘人自哈喇托克托地來歸遂有是詔以塔爾尼為
千戶八年回回哈勒瑪雅叛於肅州約塔爾尼為援
拒不應而率部下禽賊六人以獻帝喜詔改千戶所

為衛擢塔爾尼指揮僉事其部下授官者三人十一年以禽叛賊魯達噶來獻進秩久之卒子策旺沙克嘉襲進都指揮使

英宗正統五年擢徹辰都指揮使策旺沙克嘉都督僉事朝使往來哈密者策旺沙克嘉具餼糧騾馬護送故擢之嗣是威喇特兵強數侵掠隣境策旺沙克嘉懼欲徙居肅州天子聞而諭止之令有警馳報邊將九年策旺沙克嘉稱老不治事詔授其子阿蘇都督僉

事代之威喇特酋額森遣使欲娶策旺沙克嘉女為
子婦阿蘇拒不從而乞徙善地帝諭以土地不可棄
令獎率頭目圖自強又以其饑困令邊臣給之粟
天順元年徹辰衛都督僉事阿蘇進秩左都督

先是景泰二年兵部尚書于謙言徹辰諸衛久為我
籬籬額森無故招降結親意在撤我屏蔽宜令邊臣
整兵慎防并敕阿蘇悉力捍禦有警馳報發兵應援
從之五年額森益圖蕪并遣使齎印授阿蘇脅令臣

服阿蘇不從報之邊臣會額森被殺獲已是年都指揮馬雲使西域命阿蘇護送往還故有是擢

憲宗成化二年阿蘇子額森達喇請襲即以父官授之七年額森達喇卒子藏布達喇嗣十四年其部人言藏布達喇幼不更事指揮僉事嘉定得衆心乞遷一秩俾總衛事藏布達喇亦署名推讓而罕東酋長復合詞奏請且云兩衛番人待此以靖帝納其言擢嘉定都指揮僉事暫掌印務時吐魯番猶據哈密哈密

都督哈沙結徹辰為援復其城有詔褒賞十九年鄰
番伊實埒克來侵大肆殺掠徹辰遂殘破其酋長訴
於邊臣給之粟又命繕治其城令流移者復業徹辰
自是不振

嘉靖七年授索諾木旺舒克為都督統其帳

先是弘治中阿木古朗破扎蘭猶用徹辰兵後許進
西征徹辰亦以兵來助至正德八年吐魯番遣將據
哈密遂大掠徹辰奪其印而去及彭澤經畧始以印

宋時已蕃賊犯肅州與中國為難徹辰當其衝蓋遭
蹂躪部衆不能自存盡內徙肅州之南山其城遂空
至是總督王瓊撫安諸郡核徹辰之衆僅千餘人乃
授鎮布達喇子索諾木旺舒克官統其部帳

明史徹辰蒙古衛傳曰出嘉峪關西行二十里曰
大草灘又三十里曰黑山兒又七十里曰回回墓
墓西四十里曰驕馬城並設墩臺置瞭卒城西八
十里即徹辰蒙古漢燉煌郡地晉屬晉昌郡唐屬

瓜州元如之屬沙州路

沙州衛

明成祖永樂二年命置沙州衛

先是洪武二十四年蒙古王子阿爾噶錫里遣使來朝貢至是酋長昆濟撈邁珠率衆來歸乃有是命授二人官八年邁珠卒昆濟撈掌衛事

宣宗宣德元年沙州饑命予穀種

昆濟撈以歲荒人困遣使貸穀種百石秋成還官帝

曰番人即吾人何貸為命即予之七年又奏旱灾敕於肅州授糧五百石九年遣使奏罕東及西番數肆侵侮掠取人畜不獲安居乞徙察罕舊城耕牧帝敕止之曰爾居沙州三十餘年戶口滋息畜牧富饒皆朝廷之力往年哈密嘗奏爾侵擾今外侮亦自取但當保境睦鄰自無外患何必遷徙又敕罕東西番果侵奪人畜速還之明年又為哈密所侵且懼威喇特見逼不能自立乃率部衆二百餘人走附塞下陳饑

寃狀詔邊臣發粟濟之且令議所處置邊臣請移之苦峪從之自是不復還沙州但遙領其衆而已

英宗正統九年授昆濟楞子南格等官

初昆濟楞去沙州朝廷命邊將繕治苦峪城率戍卒助之六年冬城成入朝謝恩宴賜遣還七年率衆侵哈密掠其人畜以歸至是昆濟楞卒長子南格率其弟格埒克琳沁來朝授南格都督僉事弟指揮使賜敕戒諭既還其兄弟乖爭部衆攜貳甘肅鎮將任禮

等欲乘其窘乏遷之塞內而南格亦言欲居肅州之
小鉢和寺禮等遂以十一年秋令都指揮茂哈喇等
偕南格先赴沙州撫諭其衆而親率兵隨其後比至
南格意中變陰持兩端其部下多欲奔威喇特禮等
進兵迫之遂收其全部入塞居之甘州凡二百餘戶
千二百三十餘人沙州遂空帝以其迫之而來情不
可測令禮熟計其便然自是安居內地迄無後患而
沙州為罕東巴特瑪斯結所有

明史沙州衛傳曰自徹辰蒙古西行二百里曰苦
峪自苦峪南折而西百九十里曰瓜州自瓜州而
西四百四十里始達沙州漢燉煌郡西域之地玉
門陽關並相距不遠後魏始置沙州唐因之後沒
於吐番宣宗時張義湖以州內附置歸義軍授節
度使宋入於西夏元為沙州路明成祖置哈密沙
州徹辰罕東四衛於嘉峪關外屏蔽西陲自正統
時沙州先廢而諸衛亦漸不能自立肅州遂多事

罕東衛

明太祖洪武三十年詔置罕東衛授其酋索諾木喇寶
指揮僉事

先是二十五年涼國公藍玉追逃寇齊竒爾蘇至罕
東地其部衆多竄徙西寧薩拉為書招之遂相繼來
歸至是索諾木喇寶遣使入貢故有是詔洪熙元年
官軍征庫春賊罕東指揮使吹嘉勒從征有功擢都
指揮僉事賜誥世襲宣德元年又論從征庫春功擢

綽爾濟都指揮同知正統九年綽爾濟卒子藏布爾
結嗣職十一年進都指揮使

明史罕東傳曰初大軍討庫春安定部內及罕東
密羅族人悉驚竄事定詔指揮陳通等往招於是
罕東復業者二千四百餘帳男婦萬七千三百餘
人安定部人亦還衛

成祖永樂十年罕東肆為剽掠降敕責之

時安定衛奏罕東數為盜掠去民戶三百復糾西番

阻截開陞帝降敕切責令還所掠至正統四年罕東
安定合衆侵西番新藏族掠其馬牛雜畜以萬計其
僧訴於邊將亦切責二衛令悉歸所掠明年冬綽爾
濟偕巴特瑪斯結共侵掠哈密人畜忠順王遣使索
之不予復賜敕戒諭然苗人以剽掠為性亦不能盡
從也十八年其部下掠番族有侵入河清堡者都指
揮梅琛勒兵追之奪還男婦五十餘人馬牛雜畜四
千五百有奇以時方聽調協取哈密諭令悔過不討

其罪二十二年遣官往哈密與吐魯番家屬四百人偕行道經罕東為都督巴特瑪等掠去朝使僅免帝第命人往諭如番人例議和還所掠物而已弘治十二年其部人侵西寧隆奔族掠去印誥及人畜兵部請敕都督宣諭其下毋匿所掠盡歸其主違命則都督自討從之

憲宗成化九年罕東以兵助征吐魯番

時吐魯番陷哈密都督李文西征以兵來助後都督

罕慎復哈密亦籍其兵賜敕獎賚弘治中吐魯番復據哈密兵部馬文升訪知罕東有間道不旬日可達哈密屬巡撫許進遣人論罕東發兵三十前行我師三千後繼各持數日乾糧出其不意兼程襲之會罕東失期不至官軍仍由大路進賊得遁去

明史罕東傳曰弘治時吐魯番日強數侵掠鄰境諸部皆不能支正德中蒙古大酋入青海罕東亦遭蹂躪其衆益衰後吐魯番復陷哈密直犯肅州

罕東復殘破相率求內徙其城遂棄不守嘉靖時
總督王瓊安輯諸部移罕東都指揮策丹部落於

甘州

罕東左衛

明宣宗宣德七年命巴特瑪斯結為罕東衛指揮使

初罕東部人安扎逃居沙州境

見土貢考

部落日蕃不受

罕東統屬至洪熙時其子巴特瑪斯結從討庫春有
功賞未之及至是自陳於朝乃有是命然猶居沙州

不還本衛正統四年沙州衛都督昆濟楞以巴特瑪
斯結侵居其地乞遣還賜敕宣諭巴特瑪斯結不奉
命時徹辰衛指揮綏赫者因殺人遁入沙州地巴特
瑪斯結納之綏赫者又令其子往烏斯藏取毒藥將
還攻徹辰徹辰都督策旺沙克嘉以為言亦敕諭之
久之沙州全部悉內徙巴特瑪斯結遂盡有其地十
四年甘肅鎮臣任禮等奏巴特瑪斯結潛與威喇特
額森通好近又與哈密構兵宜令還居本衛再賜勅

宣諭亦不奉命成化中卒孫哲格嗣職部衆益盛

憲宗成化十五年九月始建罕東左衛於沙州故城令哲格以都指揮使統治之

時吐魯番強侵居哈密哲格與之接境患其逼已欲自為一衛奏請如罕東徹辰例立衛賜印捍禦西陲故有是命二十一年北敵屢犯沙州哲格有斬級功擢都督僉事弘治十七年威喇特及安定部人大掠沙州人畜哲格不能自存叩嘉峪關求濟敕賑給之

正德四年哲格部內番族有刼掠鄰境者敕哲格曉諭諸族悔過息兵哲格卒子竒塔特嗣十一年吐魯番復據哈密以兵脅竒塔特降附遂犯肅州左衛不克自立相率徙肅州塞內竒塔特卒子日高嗣自竒塔特內徙其部下特默格圖巴二人仍居沙州服屬吐魯番歲輸婦女牛馬會番酋徵求竒急亦率部族五千四百人來歸沙州遂為吐魯番所有

哈瑪爾

明太祖洪武十三年都督濮英請開哈瑪爾之路以通商旅

哈瑪爾地近甘肅元諸王烏納實里居之時英練兵西涼以出師畧地為請遂進兵烏納實里懼遣使納款二十三年帝聞烏納實里與別部讐殺諭甘肅都督宋晟等嚴兵備之明年西域回紇來貢者多為哈瑪爾所遏有從他道來者又遣兵邀殺之帝聞之怒命都督餘事劉真等由涼州西出乘夜直抵城下四

面圍之其知院岳山夜縋城降黎明烏納實里率家
屬突圍遁去遂攻破其城斬幽王伯勒齊爾特穆爾
等一千四百人獲王子伯勒齊爾部屬千七百三十
人至二十五年遣使請罪帝賜白金文綺此後不復
見

欽定續文獻通考卷二百四十七

欽定四庫全書

欽定續文獻通考卷二百四十八

四裔考

西域

烏斯藏

大寶法王等

臣等謹按一統志烏斯藏自

本朝崇德七年即遣使歸誠其後遣使貢獻不絕後復遣大臣駐防其地亦屬國也茲附於西域者仍

明史之舊耳

元世祖至元六年尊烏斯藏僧帕克斯巴為大寶法王
帕克斯巴者土番薩斯嘉人族欽氏生七歲誦經數
十萬言通大義國號聖童故名帕克斯巴年十有五
謁帝於潛邸大見親禮中統元年十二月尊為國師
至是遂升號大寶法王更賜玉印十六年卒賜大元
帝師之號自是其徒嗣者咸稱帝師

明史烏斯藏傳曰在雲南徼外去雲南麗江府千

餘里四川馬湖府千五百餘里陝西西寧衛五千餘里其地多僧無城郭羣居大土臺上不食肉娶妻無刑罰亦無兵革鮮疾病佛書甚多楞伽經至萬卷其土臺外僧有食肉娶妻者

臣等謹按元史世祖紀以梵僧帕克斯巴為帝師蓋即帕克斯巴也若烏斯藏有宣慰使司等則百官志謂僧俗並用云

明太祖洪武五年十二月烏斯藏攝帝師喇木展巴藏

卜遣使至京

帝懲唐世吐蕃之亂思制御之惟因其俗尚用僧徒
化導為善乃遣使廣行招諭又令舉元故官赴京授
職於是攝帝師遣使來京賜紅綺禪衣及輦帽錢物
明年二月躬自入朝上所舉故官十六人悉授以職
改攝帝師為熾盛佛寶國師仍賜玉印玉人製印成
帝眎玉未美令更製其崇敬如此

成祖永樂元年遣使齎書幣往烏斯藏徵尚師封大寶

法王

先是喇木展巴藏卜卒有僧噶爾瑪者國人以其有道術稱之為尚師帝為燕王時知其名至是遣使徵之四年冬既至延見於奉天殿宴賜甚厚遂以大寶法王封之

明史大寶法王傳曰永樂五年春帝將薦福於高帝后命建普度大齋於靈谷寺七日帝躬自行香於是卿雲甘露青鳥白象之屬連日畢見帝大悅

侍臣多獻賦頌事竣復賜黃金寶鈔等其徒亦加
優賜并封號印誥鈔幣已命噶爾瑪赴五臺山建
大齋再為高帝后薦福賜予優厚六年四月辭歸
復賜金幣佛像命中官護行至正統末卒

又曰正德時帝惑近習言謂烏斯藏僧有能知三
生者國人稱之為活佛欣然欲見之考永宣間陳
誠侯顯入番故事命中官劉允往迎閣臣梁儲等
並切諫俱不聽允行以珠琲為幡幢黃金為供具

賜其僧金印犒賞以鉅萬計內庫黃金為之罄盡
勅允往返以十年為期所攜茶鹽以十數萬計允
至臨清漕艘為之阻滯入峽江舟大難進易以艍
艍相連二百餘里及抵成都日支官廩百石蔬菜
銀百兩錦官驛不足取傍近數十驛供之治入番
器物估直二十萬守臣力爭減至十三萬工人雜
造夜以繼日居歲餘始率將校十人士千人以行
越兩月入其地所謂活佛者恐中國誘害之匿不

出見將士怒欲脅以威番人夜襲之奪寶貨器械
以去將校死者二人卒數百人傷者半之允乘善
馬疾走僅免返成部戒部下弗言而以空函馳奏
至則武宗已崩世宗召允還下吏治罪

又曰神宗時有僧索諾木嘉木粗者能知已往未
來之事稱活佛順義王諸達亦崇信之萬厯七年
以迎活佛為名西侵幹拉為所敗此僧戒以好殺
勸之東還諸達亦勸此僧通中國乃自甘州遺書

大學士張居正自稱釋迦摩尼比丘求通貢饋以
儀物居正不敢受聞之於帝帝命受之而許其貢
由是中國亦知有活佛此僧有異術能服人諸番
莫不從其教即大寶法王及闡化諸王亦皆俯首
稱弟子自是西方止知奉此僧諸番王徒擁虛位
不復能施其號令矣

十一年二月烏斯藏僧袞楚克巴勒至京封大乘法王
帝既封噶爾瑪又聞袞楚克巴勒有道術其徒亦稱

為尚師命中官齋書幣徵之至是延見禮之亞於大寶法王

明史大乘法王傳曰成祖封闡化等五王各有分地惟大寶大乘二法王以游僧不常厥居故其貢不在三年之列然終明世奉貢不絕詳土貢考

宣宗宣德九年冊封烏斯藏僧沙克嘉伊實為大慈法王

先是成祖既封大寶大乘二法王其徒爭欲見天子

邀恩寵於是來者趾相接沙克嘉伊實亦彼所稱為
尚師者於永樂十二年入朝禮亞大乘法王至是又
入朝帝留之京師命成國公朱勇禮部尚書胡濙持
節冊封之英宗嗣位禮官先奏汰番僧六百九十人
正統元年復以為請命大慈法王及西天佛子西天佛子
者能仁寺僧智元也本山東陵雲人洪永中數奉使
西國成祖使號國師仁宗加號大國師至是復加西
天佛子如故餘遣還不願者減酒饌廩餼自是輦下稍
清

明史大慈法王傳曰初太祖招徠番僧本藉以化愚俗弭邊患至成祖兼崇其教自闡化等五王及二法王外禪師僧官不可悉數其徒交錯於道外擾陞傳內耗大官公私騷然帝不恤也然至者猶即遣還及宣宗時則久留京師耗費益甚英宗初年雖多遣斥其後加封號者亦不少至孝宗踐阼法王以下皆驅還本土由是輦下復清

又曰武宗好習番語番僧復盛有封大慶法王者

或言即帝自號也烏斯藏使臣綽爾濟鄂色爾留
豹房有寵封大德法王乞令其徒二人還居本土
入番設茶禮官劉春等執不可乃罷綽爾濟鄂色
爾輩出入豹房與權倖雜處氣焰灼然二人乘傳
歸所過驛騷世宗立復汰番僧法王以下悉被斥

薩木珠卜

開化王 靈藏贊善王 納木嘉勒藏卜
袞楚克護教王 巴勒袞鳴蘭 款王 斯連

克藏輔
款王附

明成祖永樂四年封薩木珠卜僧結喇實巴勒戩巴藏

卜為闡化王

初洪武時命佛寶國師招諭番人於是烏斯藏薩木珠卜僧等自稱輦卜闡

輦卜闡者其地首僧之稱

遣使進表及方

物帝厚賜之至是封闡化王賜予甚厚明年命與護教贊善二王巴勒袞噶國師及巴勒多干隆達諸衛川藏諸族置驛站通道往來十二年復命與闡教護教贊善三王及吹巴勒吹藏等共修驛站諸未復者盡復之自是道路畢通使臣往還數萬里無虞寇盜

矣

明史贊善王傳曰靈藏地在四川徼外視烏斯藏
為近永樂五年封其僧吹斯巴勒戢藏為贊善王
洪熙元年後屢有請封齋事迄嘉靖後猶入貢如
制

又護教王傳曰護教王者名織布幹即納木嘉勒
藏卜袞楚克僧也永樂四年遣使入貢明年封護
教王宣德後以無嗣爵遂絕

又聞教王傳曰永樂十一年封巴勒衮噶僧領珍
巴勒濟藏為闡教王自此迄嘉靖世修貢不輟
又輔教王傳曰永樂十一年封斯達克藏僧納木
喀喇實巴勒為輔教王斯達克藏地視烏斯藏尤
遠自是封後教道貢使至景泰七年自陳年老復
封其子迄正德嘉靖世奉貢不絕

西天阿難功德圖

和扶
附

明太祖洪武七年阿難功德國遣使來朝

時其王伯特魯克遣其講主必蘇西來朝貢詔賜文
綺禪衣及布帛諸物

明史阿難功德國傳曰西方番國也又有和林國
師多爾濟辰類伊實巴勒藏卜亦遣其講主順努

旺舒克來朝宴賚遣還

和林即元太祖故都極北非西番其國師則番僧

與功德國
同時來貢

西天尼巴勒國

北塔國及
達瓦都松附

明太祖洪武十七年命僧智光齋書幣往尼巴勒并其

隣境地湧塔國

尼巴勒國在諸藏之西去中國絕遠其王皆僧為之
智光精釋典負才辯宣揚天子德意其王瑪特納克
囉勒摩遣使隨入朝自是貢賜不絕至永樂十六年
又命中官鄧誠齋璽書錦綺往報之所經罕東靈藏
巴勒袞噶烏斯藏及雅爾喇卜爾皆有賜宣德二年
人造中官侯顯賜其王絨錦紵絲地湧塔王亦如之
明史西天尼巴勒國傳曰又有達克都松者亦西

方之國永樂三年遣使往招之其酋以道遠不至
朶甘

元世祖至元二十五年置朶甘思宣慰司等官

朶甘在四川徼外南與烏斯藏隣唐吐蕃地時置宣
慰司招討司元帥府萬戶府分統其衆

臣等謹按元史稱朶甘思至明世則稱為朶甘矣
明太祖洪武二年定陝西即遣官齎詔撫朶甘

諭其酋長舉元故官赴京攝帝師喇木展巴藏卜及

故國公納木喀丹巴伊特戡藏等於六年春入朝上所舉六十人名帝喜置指揮使司二曰朶甘曰烏斯藏宣慰司二元帥府一招討司四萬戶府十三千戶所四即以所舉官任之降敕宴賚遣還

明史朶甘傳曰初元尊番僧為帝師授其徒國公等秩故降者襲舊號索諾木鄂色爾者歸期授朶甘衛指揮僉事以元司徒銀印來上命進指揮同知已而朶甘宣慰賞竹監藏舉首領可為指揮宣

慰萬戶千戶者二十二人詔從其請鑄分司印予
之乃改朶甘烏斯藏二衛為行都指揮使司以索
諾木鄂色爾為朶甘都指揮同知袞楚克鄂色爾
為烏斯藏都指揮同知並賜銀印又設西安行都
指揮使司於河州兼轄二都司已佛寶國師索諾
木鄂色爾等奏舉故官薩木珠卜戡藏等五十六
人命增置朶甘思宣慰司及招討等司

招討司六
曰朶甘思

曰朶甘隆達曰朶甘丹曰朶甘倉唐曰朶甘川曰
默爾根萬戶府四曰沙爾噶曰鼐珠曰羅斯端曰

埒克瑪干以薩木珠卜戩藏為朶甘都指揮同知
戶所十七

餘授職有差八年置額埒蘇軍民元帥府尋置隆
達衛指揮使司十八年以巴勒珠爾藏布為烏斯
藏都指揮使乃更定品秩自都指揮以下皆令世
襲未幾又改烏斯藏安布羅衛為行都指揮使司
永樂元年改巴勒干戶所為衛後置烏斯藏諾爾
松結行都指揮使司又置上印都衛皆以番人官之
二十六年西番斯曩日等族來朝

至永樂十八年帝以西番悉入職方其最遠博勒等
百餘寨猶未歸附遣使招之又以番族惟僧言是聽
各皆寵賜迄宣德朝禮之益厚正統初有番長移書
松潘守將趙得言欲入朝為生番阻遏乞遣兵開道
詔令得遣使招生番相率朝貢者八百二十九寨悉
賜齋遣歸成化三年阿昔洞諸族土官言西番大小
二姓為惡殺之不畏惟國師喇嘛勸化則革心信服
乃進禪師元丹藏卜為國師都綱子瑞為禪師以化

導之

明史采甘傳曰初太祖以西蕃地廣人獷悍欲分其勢而殺其力使不為邊患故來者輒授官又以其地皆食肉倚中國茶為命故設茶課司於天全六番而入貢者又優以茶布

詳互市及土貢考

諸番戀貢

市之利且欲保世官不敢為變迨成祖益封法王等俾轉相化導以共尊中國以故西陲宴然終明世無番寇之患

長河西

魚通寧
遠附

臣等謹按明史長河西魚通寧遠安撫司治碶門城即元之碶門安撫司也更以一統志考之則其地在大渡河外即打箭爐已詳四川土司天全六番傳矣

元世祖至元二十五年置長河西安撫司等官

時為碶門魚通理雅長河西寧遠等處軍民安撫使司其官屬俱隸宣政院

明太祖洪武十六年命置長河西等處軍民安撫司

先是其地打煎爐長河西土官元右丞拉幹莽遣其
理問高惟善來朝貢至是復遣惟善來乃有是命即
以拉幹莽為安撫使授惟善禮部主事二十年遣惟
善招撫長河西魚通寧遠諸處明年還朝言安邊之
道在治屯守而兼恩威帝躋之三十年春帝以長河
西諸酋陰附建昌叛酋伊魯特穆爾賈哈爾實朝貢
將興師討之恐死者必衆命禮官馳諭其酋即遣使

謝罪天子赦之為置長河西魚通寧遠宣慰司即授其酋為之

臣等謹按明史西域傳長河西魚通寧遠在四川徼外地通烏斯藏唐為吐蕃元時置碉門魚通理雅長河西寧遠六安撫司隸吐蕃宣慰司初魚通及寧遠長河西本各為部至洪武時置宣慰司後始合為一自永樂至成化貢使不絕成化十七年禮官言烏斯藏在長河西之西長河西在越雋之

南壤地相接易於混淆長河西番僧往往詐為烏
斯藏諸番王文牒入貢冒賞乃給諸番王及長河
西董卜韓胡敕書勘合以防詐偽餘俱詳土貢考
棟巴罕呼

明成祖永樂九年棟巴罕呼酋遣使入朝

棟巴罕呼在四川威州之西其南與天全六番接時
酋長納木喀遣使奉表朝貢因言達克隆莽碉門二
招討侵掠鄰境阻遏道路請討之帝不欲用兵降勅慰

諭正統三年奏年老乞以子格埒克嘉勒槃代從之
英宗正統七年命格埒克嘉勒槃掌棟巴罕呼宣慰司事
格埒克嘉勒槃先狡不循禮法乞封王賜金印帝不
許命進秩鎮國將軍都指揮同知掌司事給誥命益
恃強數與雜谷安撫及伯色寨安撫若羅構怨十年
八月移牒四川守臣謂伯色寨本父納木喀地分界
若羅父者後若羅受事私奏於朝設安撫司邇乃自
稱宣慰偽為司印糾合雜谷諸番將侵噬已地已拘

執若羅追出偽印用番俗法剗去兩目謹以狀聞守
臣上其事帝遣使敕責其專擅令與使臣推擇若羅
族人為安撫仍轄其土地且送還若羅養之終身十
三年十月又牒言雜谷故安撫阿拜小妻毒殺其夫
及子又賄威州千戶唐泰誣已謀叛今備物進貢欲
從銅門山西開山通道乞官軍於日駐迓之四川巡
按張洪等奏不可許乃下都御史寇深等計度其議
迄不行

張洪等奏云雜谷內聯威州保縣外鄰棟巴罕呼
雜谷力弱欲抗棟巴實倚重於威保棟巴勢強欲
通威保却受阻於雜谷以此讎殺素不相能銅門
及日駐諸寨乃雜谷威保要害地棟巴欺雜谷妻
寡子弱瞰我軍遠征麓川假進貢之名欲別開道
路意在吞滅雜谷構陷唐泰故所請不可許也

天順元年命札實戡架藏布掌棟巴罕呼宣慰司事

景帝景泰初棟巴罕呼侵奪雜谷及達司戀長官司

地掠其人畜守臣不能制三年二月朝議獎其入貢
勤誠進秩都指揮使令還二司侵地及所掠人民其
酋即奉命惟舊維州之地尚為所據俄饋四川巡撫
李匡銀鬯金珀求大誥周易諸書匡以上聞帝如其
言尋以還侵地賜敕獎勵六年從兵部尚書于謙等
奏其酋悖逆日彰敕守臣預為戒備至是格埒克嘉
勒榮死于札實戰榮遣使乞封王乃命如其父官仍
掌司事自是世職相承迄萬厯後朝貢不替

臣等謹按景帝實錄四川巡撫李匡奏棟巴罕呼
宣慰使格埒克嘉勒榮欲求御製大誥周易尚書
毛詩小學方輿勝覽成都記諸書因言唐時吐蕃
求毛詩春秋于休烈謂予之以書使知權謀愈生
變詐非中國之利裴光庭謂吐蕃久叛新服因其
有請賜以詩書俾漸陶聲教化流無外休烈徒知
書有權畧變詐不知忠信禮義皆從書出明皇從
之今茲所求予之謂便不然彼因貢使市之書肆

甚不為難惟方輿勝覽成都記形勝關寨所具不可殫予命如其言厥後格埒克嘉勒衆僭稱蠻王窺伺巴蜀所上奏章語多不遜且招集羣番大治戎器此尚書于謙等所以有悖逆日彰不可不慮之奏也

又按憲宗實錄成化五年四川三司奏保縣僻處極邊永樂五年特設雜谷安撫司令撫輯舊維州諸處蠻寨後與棟巴構兵維州諸地俱為侵奪貢

道阻絕今雜谷恢復故疆乞定貢期是爾時維州之地亦非復棟巴所據矣若棟巴自永樂時即比年一貢此後常遣國師與所隸伯色寨及嘉克幹斯來貢迄萬厯後不替詳土貢考

賽瑪爾罕

碩羅哈雅塔賓千哩木揭
益克賓特爾默布哈爾附

元太祖平西域命易屬賓地名賽瑪爾罕

賽瑪爾罕即漢濟必地隋曰漕國唐復舊名皆通中國帝蕩平西域盡以諸王駙馬為之君長易前代國

名以蒙古語始有賽瑪爾罕之名去嘉峪關九千六
百里元末為之王者駙馬特穆爾也

明太祖洪武二十年賽瑪爾罕遣使來朝

先是帝欲通西域屢遣使招諭而遐方君長未有至
者至是特穆爾罕遣使來朝貢馬

見上
貢考

二十五年兼

貢方物其國中回回又自驅馬抵涼州互市帝不許
今赴京鬻之元時回回徧天下及是居甘肅者尚多
詔守臣悉遣之於是歸賽瑪爾罕者千二百餘人

明史賽瑪爾罕傳曰二十七年賽瑪爾罕王特穆爾上表有欽仰聖心如照世之杯語照世杯者其國舊傳有杯光明洞徹照之可知世事故云帝得表嘉其有文

成祖初即位遣使敕諭賽瑪爾罕國

永樂五年特穆爾死其孫哈里嗣遣使齎賜幣物自是累朝不絕至嘉靖十二年偕天方吐魯番來朝稱王者至百餘人禮官夏言及樞臣王憲等言宏正間

吐魯番十三入貢正德間天方四入貢稱王者率一人多不過三人餘但稱頭目而已今吐魯番十五王天方二十七王賽瑪爾罕五十三王若循賽瑪爾罕往歲故事類荅王號人與一敕非所以尊中國制外番也謂本國所封何以不見故牘謂部落自號何以達之天朝我槩給以敕而彼即據敕恣意往來恐益擾郵傳費供億殫府庫以實谿壑非計之得也帝納其言國止給一敕且加詰讓示以國無二王之義然

諸番迄不從十五年入貢復如故甘肅巡撫趙載又
言諸國稱王者至一百五十餘人宜令改正且定貢
使名數從之

明史賽瑪爾罕傳曰其國東西三千餘里地寬平
土壤膏腴王所居城廣十餘里民居稠密西南諸
番之貨皆聚於此號為富饒城東北有土屋為拜
天之所規制精巧柱皆青石雕為花文中設講經
之堂俗禁酒人物秀美工巧過於哈烈而風俗土

卷二十四
產多與之同其旁近東有實壘哈雅塔實干薩蘭
揚益西有克實德爾默諸部落皆役屬焉

又實壘哈雅傳曰實壘哈雅西去賽瑪爾罕五百
餘里城居小岡上西北臨河河名火站水勢衝急
架浮梁以渡亦有小舟南近山人多依崖谷而居
園林廣茂西有大沙洲可二百里無水間有之鹹
不可飲牛羊誤飲之輒死地生臭草高尺餘葉如
葢煮其液成膏即阿魏又有小草高一二尺叢生

秋深露凝食之如蜜煮為糖番名達郎古賓永樂
中李達陳誠使其地其酋遣使奉貢宣德間命中
官李貴齎敕諭賜其酋

又塔實干傳曰塔實干西去賽瑪爾罕七百餘里
城居平原周二里外多園林饒果木土宜五穀民
居稠密李達陳誠李貴之使與實壘哈雅同

又賽哩木傳曰賽哩木在塔實干之東西去賽瑪
爾罕千餘里有城郭周二三里四面平曠居人繁

庶五穀茂殖亦饒果木夏秋間草中生黑小蜘蛛
人被螫徧體痛不可耐必以薄荷枝掃痛處又用
羊肝擦之誦經一晝夜痛方止體膚盡蛻六畜被
傷者多死凡止宿必擇近水地避之元太祖時都
元帥薛塔喇海從征賽哩木諸國以礮立功即此
地陳誠李貴之使與諸國同

又揚益傳曰在賽哩木東三百六十里城居亂山
間東北有大溪西流入巨川行百里多荒城蓋其

地介巴實伯哩蒙古部落之間數被侵擾以故人
民散亡止戍卒數百人居孤城破廬頽垣蕭然榛
莽永樂時陳誠至其地

又渴石傳曰在賽瑪爾罕西南三百六十里城居
大村周十餘里宮室壯麗堂以玉石為柱牆壁牕
牖盡飾金碧綴琉璃其先賽瑪爾罕酋長駙馬特
穆爾居之城外皆水田東南近山多園林西行十
餘里饒奇木又西三百里大山屹立中有石峽兩

崖如斧劈行二三百里出峽口有石門色如鐵路
通東西番人號為鐵門關設兵守之或言元太祖
至東印度鐵門關遇一角獸能人言即此地也

又德爾默傳曰在賽瑪爾罕西南去哈烈二千餘
里有新舊二城相去十餘里其酋長居新城城內
外居民僅數百家畜牧蕃息城在阿朮河東多魚
河東地隸賽瑪爾罕西多蘆林產獅子陳誠李貴
嘗使其地

又布哈爾傳曰在賽瑪爾罕西北七百餘里城居
平川周十餘里戶萬計市里繁華號為富庶地卑
下節序嘗溫宜五穀桑麻多絲綿布帛六畜亦饒
永樂十三年陳誠自西域還所經哈烈賽瑪爾罕
已實伯里阿都古巴達克珊錫喇瑪實壘哈雅賽
哩木克實揚益和卓柳城吐魯番嚴津哈密塔實
干布哈爾凡十七國悉詳其山川人物風俗為西
域記以獻以故中國得考焉

巴實伯里

元世祖時設巴實伯里宣慰司

尋改為元帥府其後以諸王鎮之

王圻曰憲宗分建諸王合丹於此世祖立宣慰司
以萬戶綦公直為使後置元帥府領屯田

明太祖洪武二十四年其王克德爾和卓遣使朝於京師
時賜以彩幣九月命使以書諭之以無厚賜為所拘
留三十年復遣官諭以朝廷德意乃還永樂元年克

德爾和卓卒子薩木察罕嗣二年哈密忠順王恩克
特穆爾為可汗果勒齊毒死薩木察罕率師討之帝
嘉其義賚以彩幣五年以賽瑪爾罕本其先世故地
請以兵復之命官齎敕戒無輕舉未幾薩木察罕卒
弟瑪哈穆特嗣十二年瑪哈穆特卒無子從子諾海
沙扎該嗣

成祖永樂十四年封諾海沙扎該為巴實伯里王

十六年其從弟布斯弒之而自立從其部落西去更

三
二
一
國號曰伊埒巴哩至宣德三年布斯卒子額森布哈
嗣正統十年額森布哈卒也密喇卜和卓嗣成化元
年後定伊埒巴哩朝貢期自是來者漸稀

明史巴實伯里傳曰西域大國也南接于闐北連
瓦剌西抵賽瑪爾罕東抵火州東南距嘉峪關三
千七百里或曰焉耆或曰龜茲其國無城郭宮室
隨水草畜牧人性獷悍君臣上下無體統飲食衣
服多與瓦剌同地極寒深山窮谷六月亦飛雪

哈里

阿都古巴
達克瑪附

明太祖洪武二十五年遣官詔諭哈里賜其王文綺綵幣
先是元駙馬特穆爾既君賽瑪爾罕又遣其子薩哈
勒據哈里洪武時賽瑪爾罕及巴實伯里咸朝貢哈
里道遠不至是年詔諭之猶不至至永樂七年貢使
始至

王圻曰在肅州之西相去一萬一千餘里東北至
賽瑪爾罕一千四百里即漢之大宛也

明史哈里傳曰一名赫魯在賽瑪爾罕西南三千
里去嘉峪關萬二千餘里西域最強大之國其旁
近阿都古巴達克珊並隸之王所居城方十餘里
壘石為屋平方若高臺不用梁柱瓦壁中敞虛空
數十間牕牖門扉悉雕刻花文繪以金碧地鋪氊
罽無君臣上下男女相聚皆席地跌坐國人稱其
王曰蘇爾坦

猶言君長也

男髡首纏以白布婦女亦白

布蒙首僅露雙目上下相呼皆以名相見止稍屈

身初見則屈一足三跪男女皆然食無匕箸有磁
器以葡萄釀酒交易用銀錢大小三等不禁私鑄
惟輸稅於酋長用印記無印者禁不用市易皆征
稅十二不知斗斛止設權衡無官府但有管事者
名曰刀完亦無刑法即殺人亦止罰錢以姊妹為
妻妾居喪止百日不用棺以布裹屍而葬常於墓
間設祭不祭祖宗亦不祭鬼神惟重拜天之禮無
干支朔望每七日為一轉周而復始歲以二月十

月為把齋月晝不飲食至夜乃食周月始茹葷城中築大土室中置一銅器周圍數丈上刻文字如古鼎狀游學者皆聚此若中國太學然有善走者日可三百里有急使傳箭走報俗尚侈靡用度無節土沃饒節候多暖少雨多育蠶善為紈綺所產獸有獅生於阿朮河蘆林中初生目閉七日始開土人於目閉時調習其性稍長則不可馴矣

又阿都古傳曰在哈里西北三千里東南去賽瑪

爾罕亦如之城居大村周十餘里地平行無險田
土膏腴民物繁庶稱樂土永樂時通貢

又巴達克山傳曰在阿都古東北城東十餘里地
廣無險阻山川明秀人物樸茂浮屠數區壯麗如
王居西洋西域諸賈多販鬻其間故民俗富饒初
其地為哈里酋薩哈勒之子所據永樂六年命內
官李達賜其酋敕書並及喀實噶爾昆都楞諸部
諭以往來通商之意皆即奉命自是東西萬里行

旅無滯

于闐

遼聖宗統和七年于闐遣使來朝

開泰四年亦如之

明史西域傳曰于闐自古為大國隋唐間侵并戎
盧杆彌渠勒皮山諸國其地益大南距葱嶺二百
餘里東北去嘉峪關六千三百里至元末國主暗
弱鄰國交侵避居山谷生理蕭條其國人民僅萬

計

明成祖永樂四年于闐遣使來朝

自是至二十二年屢遣使來皆命官報之時西域懼天子威靈不敢相擅攻于闐始獲休息漸行賈諸番復致富庶桑麻禾黍宛然中土迄萬厯朝亦間有至者明史于闐傳曰其國東有白玉河西有綠玉河又西有黑玉河源皆出崑崙山土人夜視月光盛處入水採之必得美玉其隣國亦多竊取來獻

實喇哈斯

明成祖永樂十一年命李達等齎勅往勞實喇哈斯

時因其遣使偕哈里等八國入貢

見土貢考

故命偕其使

往勞之自後每偕他國來悉與厚賜至嘉靖三年與
旁近三十部俱至從使者所乞量子蟒衣膝襴磁器
布帛

詣達戩

明成祖永樂十四年賜詣達戩酋長文綺等物

時魯安等使哈里實喇哈斯諸國復便道賜之

明史俺的干傳曰西域小部落也元太祖盡平西域封子弟為王鎮之其小者則設官置戍同於內地元亡各自割據不相統屬洪武永樂間數遣人招徠大者稱國小者止稱地面迄宣德朝效臣職奉表箋稽首闕下者多至七八十部而諳達戩則於是年與哈里同來者也

喀實噶爾

明成祖永樂六年遣中官李達等齎敕賜喀實噶爾
至天順七年又遣使至其地

明史喀實噶爾傳曰亦西域小部落

額實布哈

明成祖永樂十六年額實布哈偕鄰國來朝

自十四年使阿都古賽瑪爾罕者道經其地賜其酋
文綺諸物至是入貢其使臣有瑪哈穆特者願留京
師從其請

明史額實布哈傳曰地近諳達戡宣德六年有額
實布哈遣使臣穆爾阿里朝貢或云即額實布哈
也

呼爾察

克埒穆爾博
斯和勒附

明成祖永樂十四年呼爾察遣使來朝

命所經地皆禮待

明史呼爾察傳曰國微弱四圍皆山鮮草木水流
曲折亦無魚蝦城僅里許悉土屋酋所居亦卑陋

俗敬僧

又克埒穆爾傳曰永樂中遣使來貢其俗喜射獵
不事耕農西南傍海東北林莽深密多猛獸毒蟲
有達巷無市肆交易用鐵錢

又博斯和勒傳曰舊名蘇密爾常有白虎出松林
中不傷人亦不食他獸旬日後不復見國人異之
稱為神虎曰此西方白虎所降精也因改國名其
地無大山亦不生樹木無毒蟲猛獸之害然物產

甚薄永樂中常朝貢

達爾瑪

明成祖永樂中達爾瑪遣使來朝

賜大統歷及文綺藥茶諸物

明史達爾瑪傳曰服屬賽瑪爾罕居海中地不百里人不滿千家無城郭上下皆居板屋知耕植有毛褐布縷馬駝牛羊刑止箠朴交易兼用銀錢

納實罕

明成祖永樂中納實罕遣使來朝

使臣還歷河北轉關中抵甘肅有司皆置宴

明史納實罕傳曰東去實喇哈斯數日程皆舟行
城東平原饒水草宜畜牧馬有數種最小者高不
過三尺俗重僧所至必供飲食然好氣健鬪鬪不
勝者衆嗤之

敏真城

日落國密
色爾附

明成祖永樂中敏真城來朝

國亦大其時遣四十人來

明史敏真城傳曰其國地廣多高山日中為市諸
皆駢集貴中國磁漆器產異香駝馬

又明史西域列傳曰日落國密色爾一名密色爾
皆於永樂中朝貢宏治時日落國使臣奏求紵絲
夏布磁器正統時密色爾復來禮官言其地極遠
未有賜例準賽瑪爾罕例稍損之

噶婁

巴達克
山附

明宣宗宣德七年噶婁遣使來朝

地近賽瑪爾罕世為婚姻其山川草木禽獸皆黑男

女亦然

明史噶婁傳曰正德二年其王薩哈勒蘇爾坦遣
指揮哈濟瑪哈穆特奉貢成化十九年與實喇哈
斯賽瑪爾罕巴達克珊皆至巴達克山之長瑪哈
穆特亦稱蘇爾坦

圖魯蘇

明宣宗宣德七年命使往圖魯蘓勞賜之

先是入貢故遣中官李貴齎璽書獎勞賜文綺綵帛

明史圖魯蘓傳曰地小周徑不百里城近山山下

有水赤色望之如火俗佞佛婦人主家柄產牛羊

馬駝有布縷毛褐土宜稌麥無稻交易用錢

阿克蘓

沙哈魯附

明成祖永樂十七年阿克蘓酋雅呼沙遣使來朝

至天順七年命官賜其國不復再至

明史阿克蘓傳曰國近天方賽瑪爾罕幅員甚廣
城倚山面川川南流入海有魚鹽之利土宜耕牧
故佛畏神好施惡鬪物產富寒暄適節人無饑寒
夜鮮寇盜雅稱樂土

又沙哈魯傳曰在阿克蘓西海島中永樂中遣七
十七人來貢日給酒饌果餌異於他國其地山川
環抱饒畜產人性樸直恥鬪好佛王及臣僚處城
中庶人悉處城外海產奇物西域賈人以輕直市

之其國人不能識

天方

明英宗正統元年命天方國陪臣附扎哈貢舟還賜幣
及敕獎其王

先是宣德五年鄭和使西洋分遣其儕詣古里間古
里遣人往天方因使人齎貨物附其舟偕行往返經
歲市奇珍異寶及麒麟獅子駝鷄以歸其國王亦遣
使隨朝使來

詳土貢考

宣宗喜賜賚有加至是乃有是命

六年王遣子賽特阿里與使臣以珍寶來貢陸行至哈喇遇賊殺使臣傷其子右手盡劫物去成化二十三年其國中回回阿里欲訪求其兄乃攜寶物鉅萬抵廣東爲市舶中官韋眷侵剋赴訴於京眷先已賁緣於內乃責爲間諜行奸遂之去阿里乃號泣而去正德初從太監谷大用言善馬出天方兵部尚書劉宇希其指議遣使諭之嘉靖五年其國遣使者爲額木都康等八王十一年稱王者至三十七人禮官以

番文二十餘通皆以索取叛人雅穆拉爲詞恐託詞
窺伺乞嚴邊備帝可其奏十七年其使臣請游覽中
土禮官疑有狡心以非故事格之然常通朝貢迄萬
厯中不絕

明史天方傳曰天方古筠冲地一名天堂又曰默
伽水道自和拉摩色四十日始至自古里西南行
三月始至其貢使多從陸道入嘉峪關在西域爲
大國四時常似夏無雨雹霜雪惟露最濃草木皆

資之長養土沃饒粟麥黑黍人皆頤頤男子削髮
以布纏之婦女則編髮蓋頭不露其面相傳回回
設教之祖曰瑪哈穆特者首於此地行教死即塋
焉墓頂常有光日夜不熄後人遵其教久而不衰
故人皆向善國無苛擾亦無刑罰上下安和寇賊
不作西土稱爲樂國俗禁酒有禮拜寺寺分四方
每方九十間共三百六十間皆白玉爲柱黃甘玉
爲地堂以五色石砌成四方平頂內用沉香大木

為梁凡五又以黃金為閣堂中垣墉悉以薔薇露
龍涎香和土為之守門以二黑獅堂左有司馬儀
墓其國稱為聖人塚土皆寶石圍牆則黃甘玉兩
旁有諸祖師傳法之堂亦以石築成俱極壯麗其
崇奉回回教如此瓜果諸畜咸如中國西瓜甘瓜
有一人不能舉者桃有重四五斤者雞鴨重有十
餘斤者皆諸番所無也瑪哈穆特墓後有一井水
清而甘泛海者必汲以行遇颶風取水灑之即息

當鄭和使西洋時傳其風物若是其後稱王者至
二三十人其俗亦漸不如初矣

默德訥

臣等謹按明史默德訥回回祖國也以一統志考
之回回地土隸入叛國及其人之入中國者直同
於華夏之民今以其為回回祖國仍附於西域

明宣宗宣德時默德訥酋長遣使來貢

時偕天方使臣同來後不復至

明史默德訥傳曰回回祖國也地近天方相傳其

初國王瑪哈穆特生而神靈盡臣服西域諸國咸

尊為別諳忒爾

猶言天
使也

國中有經三十本凡三千

六百餘段其書旁行兼篆草楷三體西洋諸國皆

用之其教以事天為主而無像設每日西向虔拜

每歲齋戒一月沐浴更衣居必易常處隋開皇帝

其國撒哈八撒阿的幹葛思始傳其教入中國迄

元世其人徧於西方皆守教不替國中城池宮室

市肆田園大類中土有陰陽星厯醫藥音樂諸伎
其織文製器尤巧寒暑應候民殷物繁五穀六畜
咸備俗重殺不食猪肉常以白布蒙頭雖適他邦
亦不易其俗

坤城

哈蘭等十一地面及羅密附

明宣宗宣德五年坤城遣使來朝

時有開中之令其使臣者瑪里鼎等即輸米一萬六
千七百石於京倉中鹽及辭還願以所納米獻官帝

曰回回善營利

坤城西域回回種故云

雖名朝貢實圖貿易可

酬以直於是予帛四十匹布倍之

臣等謹按明史坤城傳附載通名天朝者曰哈三

曰哈烈兒曰沙的蠻曰哈的蘭曰掃蘭曰乜克力

曰把力黑曰俺力麻曰脫忽麻曰察力失曰幹失

曰卜哈刺曰怕刺曰爾沙兀兒曰克失迷兒曰帖

必力思曰火壇曰火占曰苦先曰牙昔曰牙兒千

曰戎曰白曰兀倫曰阿端曰邪思城曰捨黑曰擺

音曰克訖計二十九部以疆域褊小止稱地面更載乞兒麻米兒哈蘭可脫訖蠟燭也的干刺竹亦不刺因格失迷乞兒吉思羽奴思哈辛十一地面又載魯迷去中國絕遠俱詳於土貢考中

西夏

宋寧宗開禧二年正月夏鎮夷郡王安全廢其主純佑而自立

先是紹熙五年純佑改元天慶至是安全

仁孝弟仁友子也

廢之遂殂安全改元二應天四年皇建二年至嘉定
四年殂其齊國中武王彥宗之子遵頊始以宗室策
試進士及第爲大都督府主至是立十六年自號上
皇傳位於其子德旺理宗寶慶二年春遵頊殂改元
一光定十三年是年七月德旺殂改元一乾定四年
南平王晁立二年丁亥秋爲元所取國遂亡

宋史外國傳曰西夏本魏拓拔氏後其地則赫連
國也唐貞觀初拓拔赤辭來歸賜國姓其後析居

夏州者號平夏部至末年拓拔思恭討黃巢有功
復賜姓李思恭卒弟思諫代思諫卒思恭孫彝昌
嗣梁開平中彝昌遇害將士立其族子仁福仁福
卒子彝興嗣後唐清泰二年加定難軍節度使晉
初加同平章事開運初契丹授西南招討使漢初
加兼侍中周初加中書令顯德初封西平王世宗
即位加太保恭帝初加太傅至宋太祖建隆時加
李彝興太保乾德五年彝興卒追封夏王子克睿

立太宗太平興國三年卒子繼筠立五年卒弟繼
捧立七年率族人入朝願留京師其族弟繼遷數
來爲邊患用宰相趙普計委繼捧以邊事令圖之
因賜姓趙氏改名保忠至鎮數月上言繼遷悔過
歸款乃授繼遷官然實無降心也嗣反爲所圖併
其衆雍熙二年襲據銀州三年遼以女嫁之冊爲
王自是數擾邊真宗咸平六年春遂都於靈州景
德元年卒子德明立奉表歸順乃授爲西平王大

中祥符元年遼亦冊爲大夏國王仁宗天聖六年
遣子元昊拔甘州八年瓜州降於夏九年德明卒
子元昊立襲封西平王宋改元明道元昊避父諱
稱顯道於國中景祐二年悉有夏銀綬宥靜靈鹽
會勝甘涼瓜沙肅而洪定威龍皆即堡鎮號州仍
居興州阻河依賀蘭山爲固寶元元年遂築壇授
冊即皇帝位國稱大夏年號天授慶厯元年敗我
師於好水川關右震動三年復直抵渭川焚掠而

去四年始上誓表而帝其國中自若八年殂改元
四開運一年廣運二年大慶二年天授禮法延祚
十一年子諒祚方期歲宋以其繼立冊爲夏國主
嘉祐六年自言慕中國衣冠當以此迎使者詔許
之英宗治平四年諒祚殂改元五延嗣寧國一年
天祐垂聖三年福聖承道四年禪都六年拱化五
年子秉常立神宗熙寧二年冊爲夏國主元豐四
年其母梁氏奪秉常政詔興師問罪大舉征之師

卒無功五年復有永樂城之戰官軍熟羌義保死者六十萬人錢粟銀絹以萬數者不可勝計而夏人亦困弊哲宗元祐元年秉常殂改元四乾道二年天賜禮盛國慶五年大安十一年天安禮定一年子乾順立冊爲夏國主元符二年遣使進誓表徽宗建中靖國元年始建國學設弟子員三百立養賢務以廩食之崇寧三年遼以女嫁之高宗建炎元年時金已滅遼遣使約夏侵宋乾順許之紹

興九年乾順殂改元八天儀治平四年天祐民安
八年永安三年貞觀十三年雍寧五年元德八年
正德八年大德五年子仁孝嗣十三年建學校於
國中立小學於禁中親爲訓導十六年尊孔子爲
文宣帝十七年策舉人始立唱名法十八年復建
內學擇名儒主之二十八年始立建濟監鑄錢孝
宗乾道三年其國相任得敬謀篡伏誅光宗紹熙
四年九月仁孝殂改元四大慶四年人慶五年天

盛二十一年乾祐二十四年子純佑嗣

臣等謹按宋史論夏在唐時雖未稱國而王其土
久矣子孫歷王五代宋祥符間德明已追帝其父
於國中逮元昊始顯稱帝厥後因之與金同亡槩
其歷世二百五十八年雖常受宋封冊宋亦稱賜
歲幣答誓詔要其實則自元昊用兵凡二十年無
能折其强者其後亦屢擾邊境未常臣順於宋也
遼聖宗統和四年授李繼遷都督夏州諸軍事

初西夏臣宋有年賜姓曰趙至是繼遷叛宋始來附
遂復姓李七年以王子帳耶律襄之女封義成公主
下嫁之八年遣使封爲夏國王十八年授繼遷子德
明朝方軍節度使二十一年繼遷薨二十二年七月
封德明爲西平王二十八年冊爲夏國王太平十一
年興宗即位以興平公主下嫁其子元昊以爲駙馬
都尉重熙元年德昭薨冊夏國公元昊爲王十一年
禁吐渾鬻馬於夏沿邊築障塞以防之十七年元昊

薨其子諒祚遣使來告十八年七月親征之十九年
遣使問罪於夏十二月諒祚上表如母訓依舊稱臣
道宗咸雍三年十二月諒祚薨四年十月冊其子秉
常爲夏國王大安二年十月秉常薨四年七月冊其
子乾順爲夏國王天祚帝乾統五年以族女南仙封
成安公主下嫁之保大三年天祚播遷乾順率兵來
援爲金師所敗乾順請臨其國六月遣使冊乾順爲
夏國皇帝而天祚被執歸金矣

金太宗天會二年夏國奉表稱藩

先是天輔六年金破遼兵夏國王李乾順遣將李良輔將兵三萬救之敗於宜川宗望至陰山以便宜與夏議和至是始奉誓表以事遼之禮稱藩請受割賜之地宗翰承制割地賜之聖宗天眷二年乾順薨子仁孝立初嗣位其臣屢作亂任得敬陰蓄異志仁孝不能制世宗大定十年乃分地與得敬自爲國且上表爲之求封世宗不許乃謀誅之章宗明昌四年仁

孝薨子純佑立泰和六年三月安全廢純佑自立再
開月死於廢所七月封安全爲夏國王衛紹王大安

三年安全薨族子遵頊立於安全薨前一月

衛紹王
無資錄

不知
其故

時金兵敗於會河堡夏人乘其兵敗侵掠邊境

宣宗貞祐三年詔議伐夏既而屢敗其兵興定四年
詔有司移文議和事竟不克先是自天會議和八十
餘年與夏人未嘗有兵革事及貞祐初小有侵掠以
至構難十年不解一勝一負精銳皆盡而兩國俱敝

元光二年遵頊傳位於子德旺正大元年和議成自稱兄弟之國三年二月遵頊死七月德旺死

嗣立者史失其

各明年夏國亡

金史西夏傳贊曰夏之立國舊矣其臣羅世昌譜叙世次稱元魏衰微居松州者因以舊姓爲托跋氏按唐書黨項八部有托跋部自黨項入居銀夏之間者號平夏部托跋思恭以破黃巢功賜姓李氏兄弟相繼爲節度使居夏州在河南繼遷再立

國元昊始大乃北渡河城興州而都之其地初有
夏綏銀宥靈鹽等州其後遂取武威張掖酒泉燉
煌郡地南界橫山東距西河土宜三種善水草宜
畜牧所謂涼州畜牧甲天下者是也土堅腴水清
冽風氣廣漠民俗彊梗尚氣重然諾敢戰鬪自漢
唐以水利積穀食邊兵興州有漢唐二渠甘涼亦
各有灌溉土境雖小能以富強地勢然也五代之
際朝興夕替制度禮樂盡爲灰燼唐節度使有鼓

吹故夏國聲樂清厲頓挫猶有鼓吹之遺音焉然
能崇尚儒術尊孔子以帝號其文章辭命有可觀
者立國二百餘年抗衡遼金宋三國侑鄉無常視
三國之勢強弱以爲異同焉

臣等謹按馬端臨考不載西夏事今從宋遼金諸
史詳補之

木波

金章宗泰和六年陝西統軍判官完顏古拉等爲宋師

所襲木波部長趙彥雄死之

時宋人入薩瑪古完顏古拉等納宋西和州守將會境上俄伏發爲所襲趙彥雄等七人死焉

王圻曰初西番既衰其苗裔曰棟戩其子巴沁嘉卜始附宋賜姓趙改名忠順忠順子永吉永吉子世昌皆受宋官襲巴揚族長金定陝西世昌換忠翊校尉既而古嚕族長戩藏殺之金遣兵執戩藏斬於臨洮市以世昌子特克爲巴揚族都管大定

四年宋破洮州特克弟扎實嘉卜與其母走避入
喬嘉族喬嘉族首領攀布與隣族木波隆布彭布
必哩四族耆老大僧等立扎實嘉卜爲木波四族
長號曰王子扎實嘉卜念金爲其父報仇欲棄四
族歸朝四族不許金使人招之乃率四族來附仍
請每年貢馬

臣等謹按馬端臨考及宋史棟戩無後其弟轄沁
子曰木征木征來降賜姓名曰趙思忠其弟巴沁

嘉卜曰醇忠是已沁嘉卜係棟戡從子乃王圻謂爲
棟戡子又謂改名忠順不知何所本也又馬端臨
考載四朝國史論謂喃氏棟戡父嘉子孫無罪而
就覆亡及金得秦隴乃求其後續血食則圻所云
忠順子孫世受宋官亦未足信矣

又按王圻續考木波北接洮州積石軍其南隆布
族南限大山八百餘里不通人行東南與疊州羌
接其西必哩族西與羅干羌接其北彭布族與西

夏容魯克族接高寒無絲枲五穀惟產青稞與野菜合酥酪食之其疆境共八千里合四萬餘戶隨水草畜牧遷徙不常云

遼史西戎附錄

臣等謹按遼史云太祖天贊二年博斯國來貢

兵衛

志博斯與吐谷渾蠻項達實烏遷布古德等皆屬國共五十有九

三年九年達實

國來貢至聖宗開泰九年十月達實國遣使爲其子冊格請婚太平元年三月復以爲請封王子班

郎君古色爾女格埒克爲公主嫁之

宋葉隆禮契丹國志進貢

諸小國有進貢又有
貢等其詳土音考

又云天贊三年大舉征吐渾

等部自後叛服不常至興宗重熙十一年十二月
以吐渾多鬻馬夏國詔謹邊防又云太祖神冊五
年黨項諸部叛帝率師征之十二月師還自後叛
服不常聖宗開泰二年七月西南招討使政事令
和沁奏黨項諸部叛者皆遁黃河北穆納山其不
叛者和坦烏密兩部因據其地今復西遷詰之則

曰逐水草又聞前後叛者多投西夏帝詔伐之五年三月其酋庫克來降太平六年二月詔黨項別部搭爾薩設契丹節度使治之興宗重熙十三年四月黨項等部叛附夏國命軍西征十月元昊上表謝罪親率黨項三部來詔許以自新而遣之又云太宗天顯三年布古德來貢自後朝貢不絕

王圻

云不知
所目

若王圻續考載太祖時烏遜常入貢則遼

史與契丹國志皆不載蓋據兵衛志而紀之也

欽定續文獻通考卷二百四十八